

# AGRICULTURA Y PESCAERIA

Den e edicion aki nos lo bay comenta algo ariba e agricultura y pesquería di antaño y al momento. Manera nos tur por comprende mas productonan nacional un pais tin, mas independiente e ta bira di e situación mundial temporario cu ta varia hopi mes. Bou di productonan nacional nos kier meen e productonan manera di agricultura, industria, etc cu ta wordo produci den e paisnan mes.

Den e productonan nacional aki agricultura y pesquería ta tuma un lugar importante ya cu nan ta di promer necesidad pa nos existencia. Ya cu Aruba tambe ta depende di e productonan aki nos lo bai trata e topico aki.

Antes nan tabata practica mas ariba e tereno di agricultura y pesquería, maske ku den e temponan aki nos por a ripara cu gracias na e ayudo di gobierno y e hopi caída di awa mas personanan ta muestra interes den e terenonan ey.

Cu antes tabata tin mas campesinonan ta debi cu no tabatin hopi empleo y pa toch e hendenan por come nan mester planta un pida cunucu pa asina ta por haja maske ta algo di come. Tambe antes no tabatin cuminda den bleki asina hopi manera awor. E campesinonan ta cuminsa traha ariba su pida tereno for di mainta tempran te ora cu solo ta basta abou caba. E temponan ey nan ta conoce solamente chapi y macheta. Cu e chapi nan ta coba e tereno y na man nan ta planta 'e simiñanan.

Asina bo por imaginabo con duru e trabou ta den un pida tereno di por ejemplo 1 1/2 hectare. Awendia bo ta djies laga un tractor hasi e tereno limpi y alavez lagé ploeg e tereno y hasta e por strooi e simiñanan ariba e tereno.

Tambe den e temponan anterior no tabatin tubo di awa. Bo mester carga awa for di tanki y pone e butishinan di awa ariba lomba di burico y asina hibe na bo tereno.


Ora e mainshinan hecha, bo tin cu bai kap nan na man cu machete. Esaki ta dura varios dias y ora bo kla bo tin cu laga e maishinan seca y despues flechanan. Luego bo ta mulanan y bo tin hariña pa pan di casuela y pápa. Den e temponan aki tur e trabaunan aki ta wordo hasi machinalmente. Ta di comprende ku asina bo ta bin kla mas liher y bo por planta un pida tereno mas grandi.

Asina mes cu e trabou di campesino tabata duru toch e tabata wordo practica masalmente.

Lastimamente cu e hendenan di awendia a perde curashi pa hasi e trabou aki ya cu nan por biba na manera menos duro. Door di technica tur cos ta posibel te hasta alimentonan pa nos curpa.

Tambe pesquería a cai masha mes. Awendia ta algun piscadornan local so bo ta haña y nos por a ripara e consecuencianan di esaki algun dia pasa ora cu e barconan venezolano no por a trece pesca aki na Aruba debi na e escarsedad di pesca na Venezuela. E prijsnan a subi y no tabatin suficiente pesca.

Pues nos ta hasi un suplica na tur e personan cu kier practica ariba e terenonan aki pa tuma curashi y haci esaki. Nos lo reviva algo di antaño atrobe y nos lo por contribui na progreso di nos isla.



PA CALIDAD Y PRIJSNAN ECONOMICO

**ALMACEN  
ELUNID**

*Tanki Flip 36. Tel 4978  
Nos ta ofrece articulos pa damas y mucha.  
Coverall, Saja, Ponchos, Pantset, Shimis.  
Den Telanan di ultimo moda, Slax y  
Saja di Jeans di Cuadra, Sapatos  
y mucho mas pa menciona  
BISHITA NOS AWE MES.*